





東武劉氏味經

樂靜先生李公文集

傳

李昭玘字成季濟南人少與晁補之齊名為蘇軾所知擢

進士第徐州教授守孫覺深禮之每從容講學及古人行

已處世之要相得驩甚用李清臣薦為祕書省正字校書

郎加祕閣校理通判潞州潞民死多不葬昭玘斥官地畫

兆窆具棺衾作文風曉之俗為一變入為祕書丞開封惟

官俄提點永興京西京東路刑獄坐元符黨奪官徽宗立

召為右司員外郎遷太常少卿韓忠彥欲用為起居舍人

魯布持之布使山陵命始下為陳次升所論出知澶州崇

寧初詔以昭玘嘗傾搖先烈每改元豐初定寬之耶



說罷主管鴻慶宮遂入黨籍中居閑十
號樂靜步
生寓意法書圖畫貯於十囊命曰燕游十友為之序以為
與今之人友或趨附而陷於禍吾寧與十者友以益有味
也初昭玘校試高密得候蒙蒙執政思顧舊恩使人致已
意昭玘唯求祕閣法帖而已使陝西時延安小將車吉者
被誣為盜昭玘察知無它吉後立戰功至皇城使遇昭玘
京師拜於前曰感公生存之恩願以名馬為獻笑却之晚
知歙州辭不行靖康初復以起居舍人召而已卒紹興初
追復直徽猷閣

樂靜先生李公文集第一

古詩二十五首

遊白鶴觀

從張聖塗乞石

送王子中南歸筠州

送徐州舉人赴省試

送李容甫歸北都

雪堂詩寄子瞻

謝劉主簿見知乞石詩

昂昂千里駒

泛泛水中鳧



李昭玘字成季



飛鴻亭

歐雀行

春日遊西池

和太守四題

摘果

培花

憫菊

觀畫

又和秉中赴履中延唐寺早飯

謝闔子常寄絃

謝李易初十月見惠洛中行扇

觀劉孝嗣寫真

送劉孝嗣茶

楊君儀招西園同飯

謝王鈐轄惠白葛苴

謁子常喜耳目慙愈

飲酒和漢老姪

遊白鶴觀



春歸數十朝八九不暇出萌芽日夜發百觜競撐突鴛言
謁仙祠古象懷髻鬢白鶴來何時蒼檜暮蕭宰雲霞斷人
世往事已荒忽解纓濯泉流深澈幾照骨毛寒不敢視下
必有神物昔人斯徜徉音影詎磨沒嗟予質于下見亦被

呵咄仰慙逍遙遊未忍塵土汨時須挹高風為我一吹拂
從張聖塗乞石

先生築高隱趣好清且獨雲龍峯上石跋草自鑿斷發竅
號陰恠窮根攬坤腹山靈不敢愛鞭叱滿崖谷危躋已穿
履大載幾折軸直欲起岩岩未容買碌碌心營今天造指
化出神速突兀傲中巔憑陵勇雙矗獸躡目睥睨龍攫腰
回蹙縮脰立幽鳥擊顛臥孤犢鯨鱗老庶利相角怒撐觸
軒昂鶴引味負巋竈跂足騰空快高思排峭驚醉目伊余
竭來遊步百吟周復願從乞其餘伴我東墻竹猿鶴莫相
嗔此客意非俗常令月色照敢使塵土辱日待風雨來起
看空遠屋

送王子中南歸筠州

荆山美璞昔未發鬼神訶守誰可奪妙工伐石強剖抉試
之烈火皎冰雪長虹射天晝不滅夜堂流光墮明月堅粹
溫厚函正氣不許時人巧雕礪羞與佩環爭細碎直登丘
壇薦天帝世無琅玕來作貢楚人未售空長慟索價當高
勿輕用緹囊十襲須珍重

送徐州舉人赴省試

淮夷之珠照夜明泗濱之石聲泠泠昔時大禹致方物神
光玉色羅廣庭此年八獻多豪英褒雄妙思相憑陵颺颺
來書去觀國瘦馬踏雪鬚垂冰長廊白晝天宇清落筆丹
冉風雲生千官拱笏赭袍近碧溝新柳黃鸝鳴金盞虎士

傳姓名魚龍卷尾隨雷聲州人洗眼望歸期會爲春風載酒迎

送李容甫歸北都

先生讀書不下堂堂上有客語琅琅弟子出觀如堵墻怪君眉彩生光芒北都鼎夫子一別久相望君來道信問使我開肺腸三日不改服猶覺芝蘭香平生寡投分一笑且去樂慙慙發黃卷鈍吻慳應大杵撞啞鍾已厭音響惡更慙河伯觀未易窮海若索寞歲華晚颼颼黃葉秋歸心劇流水忽忽不可留固知此鱣鯨肯託尋常溝直須見老聃可化南榮儔海州歲有冲天鵠卵如萍實光琢玉蜀雞眇然何敢伏羽成不須求日浴一舉將驚萬人目

雪堂詩寄子瞻

愁雲蔽日昏風發鵝毛大片舞空闌陰崖冰壓木枝折一鳥不飛人足絕山翁口掉肩擁褐斫竹擗茅勞架結堂成不用巧丹涅却畫東坡四山雪羣石嶄嶄爭皎潔門外堂間兩清冽萬境一心同瑩徹石林雲生濕肌髮布被颼颼冷於鉄半夜哀猿叫山月山翁高哦響脩越不道妻啼憂米竭世事薰膏付灰滅長安高門奔請謁赤日炙背沙埋轍僕夫汗流馬吐舌三謁不逢腹欲蕤怒氣恐成疽毒裂狂走不須求扇喝此堂一登能濯熱

謝劉主簿見和乞石詩

官居太踈冷門外少車跡蕭蕭此君軒為我慰窮寂貪饕

起餘慕遠乞南山石形模太詭陋此詠費搜撫蝦蟇欲上
甕作氣屢跳躑心知不可強怒癭猶鼓息但勞旁者觀笑
爾不量力君能惠然來抵鵲輕尺璧明月投我懷坐上光
彩溢神心巧鑄鑿變化出胸臆高言寫豪壯健讀口終吃
衝風捲濤海蕩瀟迷四極陣馬脫重圍戰士皆辟易使人
魂魄沮三日不敢食嗟余性頑闇兀兀寡知識臃腫終天
年不願借雕飾翻憐孤僻中趣味得所適拂石雲生手誦
詩風滿腋此應長不飢富貴乃毒腊人生多苦辛嗜好須
自擇

昂昂千里駒

昂昂千里駒逸氣吞九區東馳越夕兔西走窮朝烏關山

一息過躑躅疑有無快哉穆天子遠駕周四隅嘶聲想雲
海弄影有天衢昆丘距赤水度足纔須臾眷言芻粟恩豈
敢論形軀雄心忽摧頓倦步成躊躇日暮路途遠天寒毛
鬣踈此時垂耳心可復輕疲駑

泛泛水中鳧

泛泛水中鳧上下聲相呼徜徉信波浪漂濯羞泥汙晴洲
漾蘋荇兩岸眠菰蒲飲啄亦自足飛遊誰我拘候門大池
籩富屋夸庖厨何慙久垂翅未願輕投軀雖非黃鵠舉幸
與白鷺娛逃烹笑窮雁啄腐嗟飢鳥三秋熟梁稻萬里開
江湖寄言澤中子何用張羅罟

飛鴻亭

午野號空闊危堯兀苔莧臘盡風日好春回冰雪消朱絃
試揮手度響何脩脩此意復誰共古人今寂寥眷彼澤中
鴻歛起如回颺悠然薄天末去去不可招愧無雙羽翰萬
里同颺颺人生本蕭散知慮勞煎燒忤忤覘聲利僣倮隨
紛囂安知出世間造適皆逍遙帝鄉果何在久願追松喬
行歌歸去來五斗空折腰

歐雀行

田頭小兒杖歐雀雀飛上枝不敢落繞樹詆罵語聲惡三
時耕鋤一時獲老牛力盡石田薄五龍作噴風吐電赤烏
燒雲龍見逐南村賣桑北村熟狐尾縻縻穗齊屋縣門大
書催賦粟南關飛輓夜摩轂埽春縛箕十指禿一米未炊

汝先啄直須殺汝償我腹田父坐語兒雀不暴人人亦飢
但令家老千羣飽莫使征西戰馬肥

春日遊西池

雨餘風日暖野塘春水滿天影倒浮人鏡光環射眼蘭舡
不可上漠漠低烟晚歸路已埃塵滄波鳧鵠遠

和太守四題

摘菓

霜晴百菓熟採摘將薦新貯之黃金盤絢爛如星陳芑滕
待嘉客培溉昔已勤君子務種德所成非一身公家有令
思飭坐多驚人纍纍萬石富長笑木奴貧

培花

惜花如曼容
蠹實害心腹
養之近胎禍
動絕

書屋校鈔書籍

落落名王唐帝孫
筆端飛洒只逡巡
風雲絕足知何在
粉墨餘姿若有神
可信拳奇畫龍種
不應眼眩失天真
驕騮寂寞龍眠死
更復何人接後塵

暮冬書懷贈次膺

一氣推遷星復回
人生常苦歲華催
凍雲欲雪鴈聲通
臘酒正香梅信來
晝夢每因啼鳥喚
柴門獨為故人開
自憐衰晚無多事
心地都成一寸灰

又

不住寒岩不姓龐
亦無短艇釣清江
門庭晝寂人欹枕
几案春生日上窓
五鼎甘心爭逐獸
萬夫落膽看尋撞
何如種取東臯秫
爛醉牀頭酒百缸

東武劉氏味經

惜花如曼容
毒實害心腹
養之近胎禍
動絕

落落名王唐帝孫
筆端飛洒只逡巡
風雲絕足知何在
粉

原缺

此本從謙牧堂錄出

信拳奇盡龍種
不應眼眩失天真
驛驕

一卷下數頁
二卷全缺
三卷存五頁

何人接後塵

依贈次膺

一氣推遷星復回
人生常苦歲華催
凍雲欲雪鴈聲過
臘酒正香梅信來
晝夢每因啼鳥喚
柴門獨為故人開
自憐衰晚無多事
心地都成一寸灰

又

不住寒岩不姓龐
亦無短艇釣清江
門庭晝寂人教枕
几案春生日上窓
五鼎甘心爭逐獸
萬夫落膽看尋撞
何如種取東臯秫
爛醉牀頭酒百缸

又

多病猶憑藥可醫若為換却鏡中絲人生得意一搔癢世
事循環千奕棋幸有歸來陶令計何須惆悵杜秋詩慙慙
田父勞相語天命吾今不復疑

又

慙愧儒冠誤此身塗窮何假問通津門前羅雀正吾事墻
角負暄非世人自喜小槽長有酒獨驚華髮不春知君
澤畔成新築擬荷鋤犂去卜鄰

出郭閑步

城市不在眼始知天宇寬田園休歲事風物似江干茅屋
上斜照水烟生晚寒徑須追野老笑語暫盤桓

淵聖御名

寇彥時自厯下歸携古鉄刀白石壓尺見贈因以
二詩答之

素質並琳瑯磨礪若截肪動搖風莫慮點汚墨須防色滯
泉流潤聲含磬韻長願登青玉案時助寫雲章

右白壓尺

戰地久埋沒洪爐為再燒曾因土花缺不逐血魂銷擬借
庖丁手寧懸筆吏腰柔鈔勿多忌一割定相饒

右古鐵刀

次韻庭玉弟暮春作

小雨庶纖春欲歸桃花吹盡燕來遲閉門却有宜人處簾
幙陰陰睡起時

戲贈閻漢臣廟令

香火餘金月十千指呼巫覡示威權如何報得君王賜
酒慇懃祝萬年

又戲贈漢臣

蕭散官資近十千不須親舊祝無權虎頭食肉非虛語可
待誰人報有年

睡起

病夫無酒破春愁掃榻焚香作睡謀夢覺不知身是蝶午
雞聲裏思悠悠

病中聞雨

官居寥落禁門東秋滿長安一夜風老病不眠成展轉五

更鍾鼓雨聲中

吊劉孝嗣

富貴從來一羽輕胸中萬卷復何營囊錢盡處布衾短謗
焰息時墳草生一日得行須有命百年不死是高名瑤琴
掛壁凝塵滿無復當年流水聲

經睢陽有感

昔日經由一夢同高樓雖在舊游空東流不改當年水白
首已成今日翁梁苑衣冠共黃壤隋堤楊柳幾春風扁舟
莫負南來興咫尺吳松落眼中

南游道中

玉鱸金羹昔未嘗幾迴飛夢到滄浪鄉關望處歸期晚風

水聲中去路長梅使南來問行驛鴈聲北度下斜陽囊錢未盡江湖近擬買漁舟學漫郎

舟行阻雨

暮雨來何急乘時助發生水邊千樹暗篷底一燈明半夜起鄉思空陂聞鴈聲春風故留客不為阻歸程

道中書懷

竹樹出平岸人家藏遠烟片帆雲度水雙槳鴈隨船綠變春回地寒生雨後天前塗盡佳境得意且留連

又

漸入臨淮路移舟每問津行行風逆水處處雨隨人啼鳥如留客幽花忽見春白魚不論價沽酒莫辭貧

又

平野青蕪合長橋綠樹低客愁須白酒春意屬黃鸝落日鄉關遠孤村烟水迷清明能幾日却過浙江西

過盱眙宿慈氏寺

行役經旬不自聊強將登覽寄春醪淮吞汴水長增急城現南峯不讓高賈客正來喧萬井夕陽初下艤千艘明朝更作留連計醉卧西窓聽夜濤

宿慈氏遙碧齋有感

高僧邀我暫淹留細話朱轡此屢遊不見清談飛麈尾空流悲淚拂銀鈎淮山勝絕千年在人物才華一夢休欲作招魂吊餘恨晚烟疎雨不勝愁

天長道中

細草眠黃犢短籬穿綠楊春聲鶉鴉急田徑唧蛆長地暖
足春物雨頻宜水鄉羈懷不可話倒橐酒須嘗

久雨

苦雨經旬久溟濛勢未收細聲來短蓋橫點透重裘澗曲
水流急峯深雲氣浮此行吾自喜所念老農憂

南峯閑步

足見會真賞眼明逃世紛風烟入詩畫杖屨逐僧雲水濶
天疑盡峯寒日易曛羈人正愁思城角不堪聞

登龍游寺

飛御起崔嵬江晴宿霧開風幡兩州見花供四天來日月

依峯轉魚龍觸石回蓬壺在何處更擬上層臺

過虹縣有作

老態倦羈旅不堪行舸催風高鳥橫度汀轉樹交回雨過
霧猶濕春寒花未開楚僮如見問不為米南來

過淮

東風吹雨過淮濱草木精神一番新鴈起沙隄烟隔水寺
藏松崦塔招人盪胸長憶江湖月眯眼曾嫌京洛塵誰道
南來少知識向人脩竹特相親

登平山堂

斷檻歌簷風雨頻不逢心賞為重新依稀壘嶂宛如畫樵
悴垂楊今復春一闋高歌長在耳後來佳客復何人悠然

未盡雲烟思不見揚州十里塵

泊揚州城外

地占東南會舟浮百貨通惺忪喜淮祭啁哲困吳農借此韻

贈盱眙令王邦直

樽酒留連淮水邊一燈相對共茫然退閑得計我華髮撫
字有聲君壯年幸有高情種松竹可無餘忍落淮川南金
不用充行賸古錦囊中乞數篇

還家有作

還家春已晚風雨誤歸期飲 嬉兒笑形容吠犬疑江山
猶如夢中筮謾多詩未負東園醉桃花正此時

樂靜先生李公文集卷之三

樂靜先生李公文集第四

律詩

鉅野李昭玘字成季

和程適正見贈二首

北園書事三首

贈子常二首

贈故人劉器之待制

早秋書事二首

齒落

髮白有感

早秋

贈漢臣

八月十五日夜大雨

九月八日雨作

北園偶成二首

送春

有客携扇欲予題字因一絕以答之

和鮑輦七夕四絕

十月晦過舍弟庭玉處見諸人碁戰方酣頃之復過

見集者皆散獨枰尚在窓戶間然因成三篇呈子常

漢臣

御試宿集英殿雨過有作呈敏甫學士子常生日無

以為壽偶得團茶一餅因書拙詩一首藉以獻之

迎駕

喜晴寄張使君

無咎哀辭二首

送次膺赴詔

次膺哀辭三首

雨後二篇

贈漢老姪琴

某氏輓辭二首

和程適正見贈

壯歲千名幸起家十年蹭蹬一長嗟
憑陵初託風前鷓洵
汰終隨浪底沙
沒得元機問黃蘗
却將齊物付南華
感君

憐我貽佳句一段秋和照晚霞

又

簿領遲嘆陸沉滔滔何處覓知音
凌雲詞句豪難敵似水交情老更深
鼯鼠飲河聊滿腹白雲出岫本無心
從今收拾身閑計洗竹鋤花日醉吟

北園書事

葛巾茅屋自為娛門掩槐陰長夏初
昏昏難休鳩喚婦飛飛不定燕將雛
繞池曳策携雙鶴架水澆花課小奴
麥飯滿甌葵數筋丁寧車馬肯來無

又

得喪有萬理古今猶一區
鶴鳧元自足蠻觸竟同枯

又

十年蕭散愈身輕弄筆翻書亦稱情
當案忽聞緣壁墮隔池遙見啄苔行
靜疑多事非求福老覺無心勝攝生
自愛吾廬人不到何須谷口問歸耕

贈子常

幽蘭一曲思無涯炊熟黃粱已日斜
閉戶終年心似水讀書萬卷眼生花
汗流不舍浯溪刻糧絕猶須北苑牙
束帛不來人已老只將清白付吾家

又

本無機械亦非愚自信沉冥與世疎
一段畫圖冬卧雪平生樂事日翻書
田園無暇供餘稅風雨何堪倦敝廬
笑殺

貴人門下客不逢此老曳長裾

贈故人劉器之待制

文史當年共講磨扁舟此地復經過
流年屈指夢相似白髮論心喜倍多
寄眼偶懷梁苑雪臨風猶駭洞庭波
從今燕坐空寂却笑天人被佛魔

早秋書事

正晝睡方起門無雀可羅
風池亂荷蓋雨徑滿槐鶯齒髮
流年速江湖歸興多終朝買船去
卧月扣舷歌

又

晝日與琴語經旬無客過
蟬移鵲爭樹魚散雨傾河
每悟酒如聖不禁詩作魔
風聲稍蕭瑟殘熱定無多

齒落

孽蠱負困飽臙葷摧折纔能絕
禍根每遇屠門慙大嚼猶思
夢澤欲平吞初搖不為層先喪
已脫翻驚舌尚存莫與時人作
嘲笑不如緘口學無言

髮白有感

剪髮無多日星星已數莖
不空年可諱端與事俱生
安得馬肝石未嘗甘露羹
有情憐陸展解與小兒爭

早秋

大暑不可怨秋來終有時
露驚庭鵲睡風動井梧枝
逐客長夜感美人團扇悲
如何陶靖節獨與菊花期

贈漢臣

夫子以貧病終身復凍飢捉衿無可攬數米不成炊何以
謝蟋蟀獨能留戾戾徒勞問倉扁王老是良醫

八月十五日夜大雨

風伯遭讒不自停鞭龍倒海勢如傾胸中洗盡三年渴枕
底聲高帶雁聲永夜故人留不屋千倉嘉谷入新耕野人
亦有充飢幸相見春眠滿眼明

九月八日雨作

盪滌驕陽勢已迴徧流和氣入根荻簷間點急侵燈落枕
底聲高帶鴈來永夜故留人不寐輕寒未放菊全開明年
麥價應如土安用登高把酒盃

北園偶成

游宦歸來似繫匏偶依河渚寄衡茅以貧為樂漫喜酒與
世無求非絕交倚杖靜聞風過竹枕書閑看燕爭巢却憐
多事揚夫子更為立文作解嘲

又

酒昏便書榻詩瘦怯寒蘊志大懷千駟高功憶五湖何如
一盃粥晴日照吾廬

送春

終日無人畫掩扉綠陰庭草自相依輕寒曉覺池臺靜半
夜春隨風雨歸恰似舊遊鶯獨語畧無餘恨燕爭飛飄零
不解東君意却放楊花亂撲衣

有客携扇欲余題字因一絕答之

平生自笑書成癖運墨圓毫日已回六角招人聊一戲區
區老媪復能來

和鮑輩七夕四絕

織女黃姑天一隅九清飛馭盡通衢年年須作秋風約此
事朦朧信有無

奕奕流雲度太虛盛陳瓜果望天衢嘗聞刻楮三年久一
夕穿針乞得無

如何靈匹異人間脉脉相望卒卒還不用蛛絲爭送巧自
知得拙半生閑

一水盈盈會合難古今雲路暫來還幾多靈鵲成橋去獨
有棲烏月底閑

十月晦過舍弟庭玉處見諸人碁戰方酣頃之復

過集者皆散獨一枰尚在窓戶間然因成三篇呈

子常漢臣元一聯用弓字韻云兵鎮侯就國獵獲
士藏弓後以非同韻易之今亦錄於此

妙手固多暇忽兵終易窮戲餘歸一笑戰罷失羣雄風過
雨電息天明星斗空爛柯人已去斜日上窓紅

一先雖自喜百戰亦須窮狡兔有三窟連雞無兩雄霸成
秦陌廣騎去楚營空老子無知解頽然醉頰紅

得失信偶爾好謀徒自窮前功竟何在百戰漫爭雄味者
甘守拙高人成悟空不如來飲酒聽唱小桃紅

御試宿集英殿雨過有作呈敏甫學士

朝寒生廣陌宿雨漲方池霧柳和鴉重風簾為燕歌多才

惡摩詰無日不成詩

子常生日無以為壽偶得團茶一餅因書拙詩一首藉之以獻

比年方貢競爭藏膚理豐腴紫壁光虬脅左回分絕格弱衣十襲護新香貴人思澤纔浮賜俗骨塵埃不合嘗願作詩翁千載壽乘風聊復發清狂

迎駕

端門萬騎錦衣紅迤邐鳴稍下半空天極奧居黃道北瑤池歸仗五雲中金輿影度長廊日法曲聲回廣殿風泗水昔年曾夢到拜恩何幸接鸞鴻

喜晴寄張使君

使君仁術物同情日望田疇祝頌成夜滴未休心欲折朝陽初放眼光明比年歲熟多中上此事邊防繫重輕食足訟稀真可樂時傾盃酒話平生

無咎哀辭

落落孤標氣吐虹青雲指日黑頭公兩行粉字平生盡一曲龍吟萬事空夾路衣冠如昨日故園桃李又春風朱絃雖在知音絕樽酒今誰笑語同才屈千人未易量妙年文采已飛揚終身只得一麾守後日空留萬丈光風馭不來成寂絕玉樓何在隔蒼茫可堪回首魚峯路滿崦青松照夕陽

送次膺赴

詔

詞章泛濫昔稱雄飄泊文園偶未窮舊典鏡歌歸制作盛
時郊祀待形容久無青眼憐高卧新有宮詞落九重異日
錦衣還故里却尋蓮社日相從
青雲初上萬人看中路摧頽鍛羽翰一日馳聲動黃閣已
回飛夢繞長安翩翩丹鳳來天上寂寞雙松倚歲寒自笑
白頭冠尚在十年塵土不堪彈

次膺哀辭

翻然矯首奉恩除却似當年擢第初憔悴九衢林下客光
明一軸錦裝書馮陵河岳才無敵繪畫乾坤思有餘方板
赤蚪何太迫君王曾未識相如
平昔絃觴浪自怡暮年薦鷄有新知蛾眉翻作黃昏哭樂

府空傳白紵詞上國音塵隨夢斷東山蕭轅結秋悲風亭
月觀依然在遼鶴歸來復幾時

行止非人不自謀飄然一葉信沉浮躊躇去步迷三徑奄
忽平生閉一丘韶樂已聞更雅奏瑤池尤喜近中秋無人
解寫昇平事惆悵騎鯨去不留

雨後二篇

苦雨幾十日滿庭多土花行螺上墻屋倒竹卧泥沙澄景
生涼吹晴雲變晚霞却愁清夜夢無計逐池蛙
一氣不自息四時如轉丸月流天宇靜風掠葉聲乾紈扇
已謝事莎蟲將戒寒登臨偶有得不復計悲歡

贈漢老姪琴

鄒嶧孤桐不可尋
沂公舊斲萬黃金
顧余久有沉舟志
知子嘗懷欲炙心
便好安絃求妙趣
不須變雅作新音
席間弟子來傾耳
為問何人屬意深

某氏輓辭

翟第朝初罷升堂
拜已非凝塵孟光
案洒血老萊衣
奩鏡悲鸞舞庭萱
感露晞西風原上路
無復板輿歸

主饋齊家道
羞繁肅婦功
疏封秦大國
致養漢三公
世事哀榮極
人生夢幻空
好內典驚慈顏
不可望彤史
有遺風

樂靜先生李公文集卷之四

樂靜先生李公文集第五

徐州十事

鉅野李昭玘字成季

記陵冢

錄僧惠泉事跡

跋秦系詩

記白鶴泉

辯戲馬臺

記殘經

記劉向冢

錄張祐詩

說二洪

錄德宗詩

記陵冢

陵冢在城南圖經云即王陵母所葬也案班固漢書高祖入咸陽陵聚黨數千人居南陽不肯從沛公及漢王還擊項籍陵乃以兵屬漢項羽取陵母置軍中陵使至東向坐陵母欲以招陵陵母既使私者曰願為老妾語陵善事漢漢王長者無以妾持二心遂伏劍而死陵卒從漢王定天下嗚呼聖人不作禮義大壞君子猶不篤於自信而閨門女子之行能勇斷不惑者蓋亦鮮矣如衛女之思歸共姜之不嫁其風烈足以悟動衰俗者又蔑然無聞焉陵母生於暴秦之世出於閭巷之賤未嘗聞風人之詠嘆良傅姆

戒告之言一旦知其存亡去就之義而引決於死生之際豈非賢婦人耶天下大亂羣雄競逐市井氣俠小人望風託附傾貨財棄墳墓妻子冒矢石披荆棘甘心萬死之地而助為刀俎所幸封侯鼎食顯名一世爾及乎禍亂以定束手就戮猶強梁不屈謂失則為賊而犬吠非其主奚不愧於飛鳥擇木之智哉昔 恤緯而憂周之亡齊女見宣王而發四殆之嘆當其禍見於己形智生於憂患何足多也秦鹿未死劉項相持一起一仆謀臣猛士睥睨於兩可猶豫之間此能陰知其成敗之理而以死明之可謂賢婦人矣高祖起沛中委身同患者多鄉閭握手之舊獨張良以兵法試之知其能用遂從而不去較之陵母先知之

言猶有間焉夫范增不知項羽殘忍多忌非天下之度而區區與漢爭王至其言再不見用乃曰孺子不可與謀奪天下者必沛公也其後疑間一行競以疽死何覺之晚耶曾意竒計之士不及一婦人悲夫然究觀其情斷頸不辱由無累而明為人指蹤者以私欲害之也

錄僧惠泉事跡

惠泉彭城人住南臺閣子院性孤狷不妄與人交知名士多就見之一與之語落落可喜數親之則拒而不應義學超洽慕唐人為詩得趣清淡淳化初曹彬緣弭德超之諧出領節制閉閣謝客孫何自京師來久不得見以詩自詣云欲謁元戎無紹介薛能詩板在鷓堂異日登南臺聞惠

泉高槩扣其門一見如舊館於其廬饋勞加厚將歸贐以裘馬後二年何為進士舉首第二人路振官彭門何盛稱泉好義甚篤不求人知振下車携僚客詣焉其徒曰前二日聞公來已游二浙矣振留詩壁間曰漢公嘗說惠泉師解講楞嚴解賦詩今日我來師已去草堂風雨立多時至今彭門之士語方外之游者多及泉焉浮屠氏法不三宿桑下弃父母妻子如腐泥朽梗斷割支體能忍而不愛若泉之志可謂善行其所學矣嗚呼士忘其所學者不能力行義命之說而養其不動之勇結於聲利膠於事變顛倒潰亂撼搖煎爍如被壞絮坐叢棘中展轉鈎裂不可復出一聞浮屠氏之說瞪目垂頤恍若夢覺遽欲忘形骸脫世

故而翻然與之遊此自信不篤之過矣是猶燕人歸過晉國悲其城社而忘其真先人之廬冢此之謂失其本心亦泉之所笑者也

跋秦系詩

右東海釣客試祕書省校書郎秦系詩一在南臺懷古堂一在佛殿東唐書隱逸傳系字公緒會稽人天寶末避亂剡溪北都留守薛兼訓奏為右衛率府倉曹參軍不就客泉州南安刺史薛播數往見系不肯一過門張建封聞系不可致請加校書郎以傳考之系未嘗至彭城今在此有登戲馬臺詩疑其感事託賦不然酬建封之作也比有客自泉南來歸出系詩三十六篇號秦隱君集呂縉叔序其

本末與傳粗合傳云東度秣陵年八十餘卒序正元六年過丹陽不知所終此差繆異爾系詞意清遠諷而不怨有古詩人之風一時與遊者錢起韋應物劉長卿鮑防耿緯皆知名士獨權德輿深愛之非所謂大音希聲大味必淡者歟夫山林朝廷之士未嘗不兩忘而更笑故纓冠濯足則譏耕釣為亂倫枕流漱石則薄軒裳為喪我不得不然也若夫道不足興世才不足任物幸功名夸權利睢盱於頽波末路間降志愁精而不知悔彼方且杖藜引嘯於岩石之上忘形中屨而注想雲漢視此輩擾擾益蔑然矣余嘗讀系詩至於老年唯自適主事任羣兒慨然竊嘆有味其言則知系之肥遯盖有所不為而後去非沽激喜名

者也世俗之人猶欲以半通之緩繫而拘之難矣

記白鶴泉

臨角門外折行而西二十步有石井名曰白鶴泉野老云昔有兩白鶴翔唳而下因以名焉泉舊在老子祠咸平中侍御史趙及築新城限於外自是泉與祠異處人或不知也眉陽蘓公來守此邦治公之餘挾竒摘古以寓吟嘯初得泉焉味甘色白於茶尤宜以謂雖不及惠山而不失為第三水人始稱之世傳陸羽張又新水記次第二十種多出東南北州之水弃而不載一旦蘓公獨為詮賞而北人不甚喜茶雖知之弗貴也惠山當二浙之衝士大夫往來者貯以罌瓶以箴封竹絡漬小石其中犯重江涉千里而

達京師公侯之家華堂錦案招一二貴人出龍團鳳餅第而烹之雖醴泉甘露不足比名斯泉也弃於路隅人足罕至雨潦浸灌牧兒餉婦驅牛馬負甕盞飲濯其旁七月八月之間草深苔滑蝸螺鱗鮒曳涎自得道上行旅渴不得嘗歲時遊人過者既乏瓶綆一照眉髮而去蒙烟墜露涵沙浮梗以寒冽自持而不能爭名於甌鼎之間良可悲也天下之物貴於近人而賤於遠俗人之常情多隨少執競於衆羣之所趨而不察君子之獨好此幸不幸所從來而其致不能一也嗚呼物固無求於世為士則有義命者也

辯戲馬臺

城南有山建佛刹其上徐人謂之戲馬臺者也宋高祖九

日登此臺賦詩燕集故事風流至今存焉眉陽蘓公嘗考之曰山石犖确不可以戲馬其南有亞父冢疑卽故臺也余少游濡須過范睢墓喬木翳日祠宿無人里人嚴事之後讀大歷中張諲法堂寺鑄鐘記考其地今臺乃鳳皇山以此知冢卽臺寔非冢也推其附就之始出於小人好勇喜於犯險以夸其氣俗不然騷人逐客據登覽之勝壯山河悲故國借其一吊焉二者之情不同其於徇名失寔一也夫弄劍者劍殺之狎水者水溺之吾終不知羽戲馬耶馬戲羽耶當其馳騁自若顧瞻叱咤縱橫出沒思欲憑風雲超日月南驤五嶺北蹄蹠代秣流沙而飲碣石其志亦雄矣故屠咸陽收鉅鹿震讐三軍氣橫宇內將諸侯兵三

十萬畧河南而西坑秦王卒降子嬰燒咸陽宮室分王諸將如左如右指麾畧定投策故鄉以幸休息而漢王徐躡其後張良陰制其鞅田榮彭越驅逸羸而驚之矍然後起雖蹴城陽躅躅於成臯廣武之間力殫氣禡乃約漢王中分天下而諸局矣至於烏江之困不能加一箠而東謂亭長曰吾騎此馬五年所當亡敵吾不忍殺今賜公噫未之思也胡不曰使我恃鬪忌人而失天下者此馬也殺之以祭居巢老人如此則後世君子猶善其知悔焉

記殘經

南臺古刹有佛書數百卷多唐季五代時所書字畫精勁歷歷可喜按太藏經目凡五千四百卷今所存纔十一首

尾可讀者又無幾也阿含經四卷泰寧軍節度使齊克讓造廣明元年劉漢宏合黃巢侵揚州高駢兵按不出詔克讓屯汝州會許州部將周茂殺其帥薛能克讓懼下叛引其軍還克十二月巢攻潼關克讓復出戰關外士飢燒營以譟克讓遽走入關勢不能守賊遂犯京師昔王縉相代宗或夷狄入寇必合衆沙門誦護國仁王經為禳厭人事不修而終以賊敗嗚呼將相大臣不能以身任社稷安危而託浮屠氏以生死負天下多矣然辱國喪師不罹誅殛之禍者又何幸也正法華經一卷乾符六年女弟子牛妙音書僖宗既立天下多亂盜賊羣嘯王仙芝搖毒于江湖黃巢磨牙於閩粵荒墟暴骨不堪行路士大夫顧唐將亡

竄匿避禍如觸網罟畏死無日閨門女子區區媚佛以自救亦可哀矣大涅槃般若經復共三十卷武寧軍節度使朱友恭造友恭全忠養子李彥威也後為龍武都統軍與氏叔琮同弒昭宗全忠亟誅之以滅天下謗此經天復三年所書崔垂休召全忠誅宦官韓全誨劫天子奔鳳翔昭宗初不知謀全忠既至帝怒諭使還鎮未幾復引兵薄城下惡焰赫然寢逼輿衛強藩悍鎮陰虞爛額之禍進退首鼠莫肯同出一手以扶天步全忠禍心滋大欺天盜國人共怨怒友恭猶詭情佞佛以厭天下耳目使世無佛則可果佛能報應人則又將欺佛而盜福不亦愚乎毗奈耶雜事一卷德妃伊氏造唐莊宗次妃初神閔敬皇后劉氏以

微賤得立歸賜於佛性喜聚斂貨賄山積惟寫佛書饋賂僧尼而士卒不得以衣食妃為此經豈非畏后所逼耶後有印章曰燕國夫人伊氏蓋未進封時所鑄也唐制太后皇后之寶皆可寶主之未嘗用印凡封令書即太后用宮官印皇后用內侍省印而夫人不聞有用印之禮是時兩宮友通藩鎮使者旁午於道而恬不知禁則夫人私自鑄亦不為僭矣按五代史稱德妃與韓淑妃居太原晉高祖反時為契丹所虜不知是經何從至也其餘中斷橫裂蟲鏤鼠齧而敗塵腐無復完綴想夫飄散蹂藉炷燈拭案補壞帷塞屋漏者又不勝其數也釋氏之戒能為人寫四句偈獲福無量心生不信罪抵千劫今其徒急弃如此何頑

之甚也不然禍福自人不在於黃藤赤軸之間耶余感其禍亂之迹殘缺之餘因書其事聊寄其一嘆云

記劉向冢

酈元水經云汴水西十五里有楚王山自楚元王之後世葬於此凡十三冢皆結石為之今向冢獨在城北五里蛇穿豕鬣斷垣破甍茅棘蕭然疑其世非襲封不得與先王之兆域而為別卜故也向元王之元孫以經明行脩擢諫大夫蕭望之周堪以向忠直薦於朝元帝懦昏小人比德許史以外戚干政恭顯以近倖盜權向肺腑之親乃心王室抗危言吐孤憤必欲推位小人拔天下正直之士在帝左右以清天憲方羣邪側目相與攻詆勢不能支初下獄

免再為庶人終十年見廢蕭望之周堪皆被誣自殺向獨
得不死而志亦不少哀可謂忠矣惜乎既以身當怨殺然
特立不能暴小人之惡揚於王庭以動天下之公義及使
外親上變而戒帝無漏言彼所以揣其不足畏而又欲擠
之者也當是時韋元成貢禹以經術位大臣不能助善排
惡為向明區區之義指以為罔上不道由此觀之為向之
言者果亦難矣厥後成帝耽於內嬖王氏專制威福上下
之勢將轉衣為裳忠臣良士惴惴懼禍向引春秋變異欲
以劫其心而終不省其一二豈言有所未中歟趙氏殺太
子國嗣屢絕當此之時因以天性不忍之愛父子之至情
引諭禍福指明治亂之漸庶幾惻然知悔焉夫震雷變色

作於須臾蜂蠆螫手終身戒之何則遠於人者不必甚畏
而迫於所愛則惟恐傷之也若向之博極羣書議論不詭
與董仲舒揚雄司馬遷相先後可謂命世之才矣於今洙
泗之上士多博洽庶靖樂道者蓋向之遺風云

錄張祐詩

勝因禪院有王智興詩刻凡十餘篇最後處士張祐酬智
興詩曰更有柱天功業外李陵章句右軍書智興本徐州
牙兵屢擊李師道有功為沂州刺史長慶初河朔用兵充
武寧軍節度副使領河北行營朝廷用崔羣為武寧帥羣
畏智興蹇捍密請追還京師未報會赦王朝奏諸節度班
師智還羣遣僚屬迎之戒吏士委甲智興斬關以入殺異

已者十餘輩然後謝羣曰此軍情也羣為治裝去智興以
兵衛送還朝至堽橋掠鹽鉄院劫商旅逐濠州刺史侯洪
度朝廷方罷兵不能討詔以全節付之祐所謂柱天功業
者亦已誣矣字畫柢梧如刀筆吏所為詩句淺惡甚於里
巷小人嘲啁不根之語祐比之李陵右軍又不情之甚也
嘗讀杜牧與祐詩以謂千首詩輕萬戶侯此豈足以輕萬
戶耶唐自元和以後士人多以辭章遊王公之門謂之投
卷所幸者大則薦聞於朝小則資以賕貨士之急於人知
無甚於此時也戰國之士挾持詭說以搖諸侯一見而為
客卿再見而為國相在則令人安去則令人危全城廣地
獻於朝白璧黃金將其後較其所得止足以詫怨妻賣仇

女後世謂之賤丈夫况夫彫畫章句卑辭斂衽以幸一顧
之價而自信於終身其視賤丈夫猶十百也習俗之弊使
人如此嗚呼信道不篤喜於自媒能不以禽美言為禽犢
者寡矣

說二洪

泗水有二洪自城南五里曰百步下百步六十里曰呂梁
百步言其長之數呂梁則見於莊子者也鉅野之北眾水
合并匯為大澤大澤之水又決為兩支一則北過於汶循
齊之右足而入海一則南過於沛走彭城之脅達於淮而
入於海由沛而上則謂之泗水泗與汴交流爭於兩洪如
吐於咽嗑之中怒不得逞此湍險之患也夏秋之交時雨

暴集不辯牛馬霜寒水落石巨礫砢如伏鬥士布陣馬水
之來也左旋右折而爰出於兩翼之間騰踏披揚而出立
而睨之股搖目轉疑與之俱翻瀕河之人狎水如陸御舟
如馬習於疾徐上下之數挾以專利行人往來一聽其可
否之說少不當意則操篙却立負絙鞭牛而不顧其用情
酷矣景祐中李文定公過水大涸起徒千人火烈而溢沃
之批以巨鑿而排以飛鏈雖不能盡去其害而勢亦少洩
後之議者必欲行公之志使之澁漫安流而後已此曉論
也夫泗之為水若江漢之有源也游而無節則不數晝夜
而竭安復有舟楫之利哉人且車矣夫天下之事有人力
所不能爭者皆天也世俗之人必曰前人所未至而天下之

無易於我而力為之其克濟者鮮矣自古功名之士好為
竒智拂天下之公是強所不能以成其私欲未能以三為
四而其末流卒至於大壞不救由是觀之莊周塞聰攬拍
之論良有取也

錄德宗詩

唐德宗賜張建封詩皇太子誦書在太守治事堂之東正
元四年拜建封徐泗濠節度使以備李納十三年朝京師
帝不待日召見延英殿建封賦朝天行以獻將還帝賦詩
以餞之即此詩也德宗性猜忌諱通懷諫甘心姦諛用盧
杞為相賊殺賢士大夫流毒於民天下側目欲食其肉猶
曰我未見其姦邪其狠暗可知矣奉天之難大器幾覆殘

家破國出於心寒股栗之餘深自懲創始行姑息之政優
恩曲遇如撫藉兒女欲以結強臣悍帥之心而方鎮日益
怙亂唐之威令自此微矣建封以忠力自明寫情帝側故
歡然眷與動其忠槩親製其詞文使儲后書之可謂異數
矣然自正元以來忠佞不分誅賞無信予奪不專於天子
其失民心誤天下非一日也四方幸亂兵拏不辭四凶二
孽煽禍相憂朝廷出師問罪如持三尺箠行羣虎狼中既
驅於前已攬於後豈封建一手足之力所能捍哉觀德宗
初用陸贄於艱難奔播之中能聽其言引過自歸以謝天
下故詔書所至武夫暴卒無不感涕毅然宣力戡復之功
贄有力焉及事平之蔽裴延齡之讒遽欲誅之其忍戾不

仁如此反欲以方尺之紙膚革之言以起天下之義心芟
除根柢之患固已難矣嗚呼自古君臣相與之際無漢高
祖之大度光武之赤心唐太宗之知人猶以功業望人者
雖行道之人猶不信也

樂靜先生李公文集卷之五

樂靜先生李公文集第六

記六 執

鉅野李昭玘字成季

濟州真武殿記

徐州巽臺記

真樂堂記

葬遺骸記

任城修佛殿記

負日軒記

濟州真武殿記

北極大帝位紫微垣左右四將真武在其序明盛正一寔
帝之司殺者也按太上真武經元始天尊於上元天宮說

無上至真妙法時魔鬼流行橫毒人命幽冤之氣上蒙天
闕有北方大神將號曰真武能以正法祛攝邪厲即以符
名之付之馘滅生人既安乃復其位大無量心不斷仁濟
晦朔之間一降真馭蕩除不祥扶翼廉善故尊事祈報之
禮甚虔而度危救厄之功著見非一天禧二年有龜蛇見
於都城東南隅即真武之負足神也居民不日建堂其上
以表異之有泉湧其側病者謁之一飲良愈詔遣中使度
地置觀名曰禪源加真武號曰靈應真君凡神降之日公
侯貴人宮闈戚里朝士大夫閭巷庶人屏居齋戒奔走衢
路摩肩擊轂爭門而入歲以為常方州小邑間設祠宇寢
以不治雨漏塵委狐鼠穿穴靈響寂絕無所憑附大家富

室猶能虛館寓嚴器飾薰被汎埽以迎其來下里寒陋敗
帷破屋父子喧呼腥穢不除欲望雲旗聞風馬九天寥寥
區域萬里果何在也夫大淵空谷窅然靜深如有神物使
人色動形悚無敢狎侮有所畏故也是心也人誰無之願
作之何如耳天慶觀舊無真君祠奉議郎陳公穀語道士
史知真曰天之威神位在黃錄汝知日誦其經不能為人
請福亦黃冠之罪人也余願以月俸三十萬造真像寄位
三清之側以示警發度材聚工峙基結宇汝之責也知真
領其語因謁諸里人有河東薛洙者士族子也歡然應之
曰此吾志耳相與風曉善類積錢一百三十萬度東南隅
為殿四楹涓日之良作大醮設以奠神位劔芒霜冽目采

電射元衣矯首赤靈吐舌天丁玉童猛厲靜莊旗旛飛揚
微風觸人香篆上騰髣髴雲霧衣冠士庶羅立庭下拜而
升拜而獻獻而祝又拜而退踧躅屏息無敢噫唾如負山
岳如臨崖谷猶恐神之不享也非有畏心孰能使之方斯
時也志專氣柔五官無邪七情不競恍惚之間影動響觸
莫知神之所以來也如是者特須臾之感耳幣焚器徹飲
福言歸行路顧瞻不見可畏向時之心寢爾迷滅神之去
人亦復遠矣神行乎空虛遠之不得踈近之不得親因人
之心為之去來故化材以成象因象以致其心此奉祠之
意也人能有常心不變不惰如獻祝之際日勵而時出之
無入不為善則神將保汝為福無窮事之順適者不祈而

獲顛危疾苦必有以振虎符不飛靈劍不試伏妖飛症嘯
梁瞰室之禍無得而憑陵矣凡諸邦人儆戒無忽政和五
年四月二十日記

徐州巽臺記

徐古大州氣象雄奧面抱巨峯背負連嶂汴泗走乎兩肋
長洪蓄於衿領之間重岡鈎阜夾曳旁立如鬪如逐如邏
如遇雖欲放觀長想意已迫矣州之東南地勢委靡紆以
平林演以廣隰山舒而水緩悠然逝隕然止如大路馬安
安徐步如隱君子偃卧退匿可望而不可及使人心目暢
達而不病乎拘虛獨此一隅爾鳳山僧行介即其居之餘
址疊石為臺崛然百尺以直其隅憑陵半空睥睨孤殺東

南之勝交薦於臺上臺上之觀委地而無窮也涼秋八月
金氣既明草木鮮靜天宇空澈太守王公率僚屬登其上
而燕飲焉是時也微風颺颺墮乎欄檻颺颺乎衣裾颺然
撒巾髮而通也煩昏頓祛神爽超發邈焉引覽千里在睫
况練光之橫溢度紺螺之明滅飛帆歛見孤鷺乍失不舟
不穀以意為適直將跨流雲於蒼莽軼征鴻於沓寥而後
已也公顧客曰異日有此樂乎吾欲據東南之會名此為
巽臺非特辨方配物又以表吾之所樂也有客曰巽之名
則稱所以為巽之說竊為公發焉解倥偬而攬高明逃喧
囂而接遐曠欣於暫得而橫謂之樂非樂也今夫肆目之
所逐快心之所適觀滄海之浩茫識閭崑之縹緲搏扶搖

檄膠葛浮河漢而問津於牛女猶未厭也須臾思窮力怠
摧頽却顧盃案狼藉人語眊眊曾未離乎一席之上已愀
然不悅及乎風霾暴勃霧雨迷塞天寒日蹙不可竚立響
來之樂顛倒潰亂不可復覩而憂隨之矣大哉樂乎古之
為道者不交於物意無所至收耳目之役閑吾神明之舍
冥乎至虛以六合為內如此則高明遐曠無時而不與吾
俱存又何能終日栩栩從物飛揚而不返哉故易曰巽入
也

真樂堂記

李子以書乞墨竹於眉陽先生先生不妄許可得李子之
言喜而不拒作大小竹石二番以貺焉李子再拜而受正

顏色而觀之柯葉修勁聳動偃仰風雨霜霰所不能凌廉
角竅缺盤礴瓦肆百夫不可轉也一日而神動二日而心
化三日不知形骸之所忘意慮之所得彷徨顧步如恐其
忽然失之也當此之時雖疾雷不驚飄瓦不觸况乎睡寐
飢飫晦暘寒燠所能覺哉先生謂李子曰君豈復事此兒
女子喜好者也先生道德高重冠服天下歎然猶以兒女
自處則眇乎不足數者非敢與知也富貴聲色得之則淫
美怠教不得之則窮日力而爭此壯者之所好也飽蜜梨
粟得之則莞爾而笑不得則雖若有失而不知所怨此兒
女之所好也及夫愁精搖思昏病羸倮雖堂堂之軀未嘗
不為兒女之所輕挾懷咀嚼叫呼相擲雖三尺之子未嘗
不為壯者之所嘆二者之好果誰樂邪然而壯者之好無
窮兒女之好易足吾以易足者為真樂夫為天下所笑必
以笑天下者也為眾人之所弃必亦弃眾人者也物我未
定不可奪此而與彼則姑從所好吾豈知有物哉今以先
生石竹挂於坐因名其堂曰真樂且以成先生之既而不
敢忘也

葬遺骸記

元豐壬戌京師之東自春徂夏連數州不雨徐與他州獨
屢飢而旱甚故其民尤病太守高郵孫公哀民之久窮也
寤寐如疚憂見言色凡山川之在境內與其佛老子之祠
不以遠近疏數皆躬請焉至於徙市舞雩之法亦優為之

雖雲徂雷升徬徨回薄距城四五十里輒止疑若有所忤而却者人莫知也是時民以艱食往往盜發荒冢取故埽以售日或百數州有書生江天錫能道晉相和魯公凝記夢事因客以獻請公加禁罰公聞之惻然翌日下令戒民毋得發冢期以不貸遣校吏拾野中遺骸得一百八十餘軀葬於南城官之廢地為之祭告而後掩焉後三日大雨一夕而足初魯公微時偶歲早夜禱於家庭既寐夢游新橋頭數十人聚語道上若弔若賀者怪而問焉前一人對曰吾昔居賓德坊開德二年死葬於金山之陽吾之閭里附金山而葬者八十餘家歲遠子孫淪亡祭祀不主無理之人輒破墓暴骸斂陶甃以為貨悠悠之魂無所棲息故

冤哀之氣上薄於天帝寔同怒踰時不雨使彼方之民愁餓危蹙為吾等報也然來者猶未已吾方得理於帝君能為我言諸守長可為之禁而歸吾故宅庶幾可和陰陽回帝怒而致膏澤焉願公無忽魯公寤即以書抵在位者如其言而為之果驗夫鬼神之難知也久矣知道者不必窮諸形聲而後信以理推之可也孔子嘗謂子路未知生焉知死未能事人焉能事鬼信乎死之與生鬼之與人雖陰陰晝夜所役之不同要之情狀猶未離乎其類也夏涼冬溫燕居燕寢覆其體膚藉以莞簟一有不足則通夕不寐及其為鬼也毀其室宅暴其支者淒風烈日無以自蔽豈獨無人情之也哉世固有賤死而蔑鬼者與其自殘也特

一聞耳昔東海繆殺孝婦三歲枯旱後太守得其故祭孝婦冢天立雨歲即大熟以此推之掩骼之報固不疑也雖然君子之用心也不期於巫祝之說亦曰仁而已矣達吾不忍人之心致吾誠而為之若夫報施之端有無之理不必論也大矣哉孫公之仁其利溥也明有以振其生幽有以安其死輒書其事以聞諸四方士大夫之仁者庶幾公之澤益廣焉元豐四年七月日記

任城修佛殿記

至人無形合宇宙以為形大道無寄因萬物以為寄形無所窮則不可思寄無所在則不可致若夫游想於恍惚之間假名於真寂之外所見非見所得非得是猶鑿地永天

止能見影尚何足以覽大空之寥寥於靈明於無碍者哉西方有聖人號其身為千百億化身無往而不通號其法為大寶藏無求而不具變化出沒廣大圓滿不離自性行住坐卧飲食馨歎皆為解脫色所不能見意所不能取以三十二相觀則相相非真以七寶布施修則布施隨盡故非去非來非有非無是名寶相持一句偈解無上意是名無量福德至於金玉珂貝繒彩雕畫纖麗昭爛作而相之其富無倫高堂廣廈丹堊藻梲岌業沉遂覆而棲之其貴無敵瞻徠引仰眦足血頰歌頌環遶無日不在是於無為中妄生緣影自以為得妙道之行是亦踈矣然則法無二門根有利鈍太上無修非心非佛其次不修佛而修心其

下不修心而修佛要其有所至一也由是觀之以色相觀以布施修是人雖不能生無所住心已於三毒火中得甘露味必竟清淨不纏煩惱與夫夸悍爰盜欺忍頑戾不知可修不見可畏如鬪獸觸格點囚抵獄不順羈紲不承箠訊跳梁掘強自速喪害者固有間矣此佛氏之崇塔廟所以有情化也昔者燕人生於燕長於楚及老而還過晉國同行者指其社曰此若里之社乃喟然而嘆指其廬曰此若先人之廬乃涓然而泣夫悲不自知對境而作凡一人禮塔廟一瞻像貌生歸信心起清淨想亦困於境而已外境所設豈能使人生如是心起如是想由自性中本來有故冥冥之民必待境而後知化乃蔽而不自思爾噫性不

在境依境而後覺境不碍性見性則自忘及乎萬想俱融一真常寂五陰六根悉是幻化山河大地悉是虛假向之所謂塔廟像貌者乃聚塊積薪而已其於佛也奚有

負日軒記

天遊子窮冬苦寒薪火不足鑿屋之南垣盜太陽之暄而曝焉大明既升赤鳥吐精元冥收威萬物皆傾叢林之鳥穴罅之蟲嗚呼攫躍磨啄伸足于于愉愉莫知所作吾方垂頭隱几閉目擁鼻偃偻而負之初焉若沃若噓強者柔屈者舒爬搔引挽無意不如少焉肌血活流經於髮膚骨內俱融充乎虛空吾不知形骸之所以為我我之有形骸邪吾不知洞戶隩室綿維十重白狐蒙茸巨爐歔煨酒行

十鍾有樂於此邪吾不知大漠之北冰厚三尺鑽木敲石
烟火不出十指欲呵呀然已路有不幸於此邪吾疑夫陰
陽氤氲太和渾淪還我以性命之根使我遊真挹醇與天
地並存而獨有此邪吾是以愛之而不知厭就之而不能
違晝則遡而東昃則遡而西竊竊然惟恐其去已也已而
義馭將宿奔於蒙谷吾不能疾走而逐於是始不豫於吾
心吾猶計之卒歲之寒不薪不火庶乎計日而長有此也
及乎朔風吹雨飛霾四昏老陰司殺怒氣慘烈其禍泣萬
物鳴者吟飛者戩吾亦拘孿拳曲扳肩累足鷓躄蝸縮敗
絮自擁淒酸百種蠢蠢時動如蠶色蛹雖沸九鼎燎登林
使吾沃而煬之恐未足發吾生氣而綴吾餘息追幸前日

之愛不可復也故吾心更悲夫一晝一夜陰陽代更一寒
一暑四時錯行此萬物無所逃於天地之間天地亦不得
私於萬物今且徇吾所愛將獨有以成吾私既知其不可
有也始則不豫於吾心終則其心更悲不亦惑歟然則天
下之物擾於利害之塗與吾身託於變化之間者果何以
獨有與至於鬪逐排擊一得一失喜怒相賊而自焚溺者
不亦大惑歟是說也雖野人不得獻之於其君吾將自事
其心焉

樂靜先生李公文集卷之六

程